

# Da Zantez Mari Madalen

*Satiner Dorez Dineault*

Var don : *Guir vugale ar Ver'hez.*

Meuleudi d'ar Vadalen  
 Da guenta pec'herez ;  
 Mes deuet dre he finijen  
 Ha dre he c'harantez,  
 O veza kavet Jezus,  
 Da veza ar c'haera skouer  
 Eus trugarez burzudus  
 Mab Doue hor Zalver.

Eun deis m'edo ar Messias  
 Ouz taol eur Pharizian,  
 Eur vaouez en he bleo noas  
 A dosteas outhan ;  
 Ha treac'hed gant ar glac'har  
 Eveuz he fec'hejou  
 En em strinkas d'an douar  
 E kichen an Aotrou.

Staga' ra he muzellou  
 Ouz treid sakr Mab Doue  
 En deveus gant he daelou,  
 A zired puill neuze,  
 Glebied ken na voent guelc'hed  
 Ha seac'het gant he bleo,  
 Ha gant kalz doujans skuilled  
 Louzou c'houez vad varnho.

Dioc'h he guelel er stad-se  
Ehars treid hor Zalver,  
Ar Juzevien a zoueze  
Heb kredi lavar guer ;  
Dreist ar re all koulskoude  
Unan, hanvet Simon,  
Muioc'h-mui a ziskrede  
E goeled he galon.

« Ah ! ma vije, emezhan,  
Hennez eur guir Brophet,  
Piou eo hounnez' zo ganthan  
En dije mad gouezed ;  
Ha n'en dije ket neuze  
Lezed da douch outhan  
Eur bec'herez evelse,  
Bruded ker fall aman !

O veza raktal lenned  
E kalon an den-ze,  
Ha diganthen goulenned  
Pehini a dlefe  
Eus a zaou zleour pardoned  
Muia trugarekaat :  
« Heb mar an hini' vefet  
Great dezhan muia vad ! »

— « Mad ! eme neuze Jezus,  
Daoust hag ar vaouez-se  
Em eus dioc'h he stad mezus  
Tenned, hag evit-se  
En deus breman evidon  
Brassa anaoudeguez  
N'elfe ket rei d'am c'halon  
Joa ha levenez ?

E guirionez, me lar deoc'h,  
E baradoz va Zad  
Netra na laka muioc'h  
An oll da laouennaat  
Egued gueled ar pec'her  
A ioa bet fazied  
O tizrei, hag o kemer  
Hent ar guir eürusted.

Hirio eta en Envou  
Elez hag arc'helez  
A gano meuleudiou  
Er vrasa levenez ;  
Ha daelou ar Vadalen  
Skulled var va zreid-me  
A roi sked d'he c'hurunen  
Hed an eternite !

« Kalz' so dezhi pardoned  
Dre m'hen deus kalz karet ;  
Eun deis e vezo gueled  
Etouez an Arc'heled. »  
Evit guir, gueled a reer  
Var an teil o tivoan  
Bokedou koant ha seder,  
Al lili ho-unan.

Santez Mari Madalen,  
Hor Patronez kared,  
Klevit breman hor peden-  
Hag hon hentchit bepred.  
Ni ive' zo pec'herien,  
Goulennit hor pardon ;  
Ha ra vezo da viken  
Da Jezus hor c'halon !

Dioc'h tan an env, ar c'hlenved  
Diouallit hor buez ;  
Mes dreist-oll dioc'h ar pec'hed  
Ha dioc'h peb hudurnez  
Diouallit hor c'halonou ;  
Hag eun deis gant Jezus,  
Pa vezimp oll en Envou,  
Hor joa' vo hirbadus.

**H. Cabilic**  
*Vic. à Dinéault.*

Imprimatur  
*Lambézellec, die 12 Nov. 1939*  
A. GADON  
V. G.